

## Governu deside senáriu fiskál biliaun \$1,797 ba OJE 2023



Sesaun traballu planeamentu OJE 2023, iha auditóriu Ministériu Finansa, tersa (26/04). Imajen Tatoli/Francisco Sony

**DILI, 26 abril 2022 (TATOLI)**--Membru VIII Governu Konstitusionál inklui entidade kada instituisaun Estadu, segunda ne'e, durante loron ida, halibur hamutuk iha sesaun traballu Jornada Planeamentu hodi rona apresentasaun ekipa Diresaun Jerál Planeamentu no Orsamentu hosi Ministériu Finansa (MF) kona-ba mekanizmu elaborasaun orsamentu ba tinan oin.

Iha sesaun diskusaun no apresiasaun ba medida prinsipál ba Orsamentu Jerál Estadu (OJE) 2023, Governu deside senáriu fiskál ho montante biliaun \$1,797.6



Ministru Finansa, Rui Augusto Gomes, halo apresentasaun iha Jornada Planeamentu, iha auditóriu MF, Aitarak-laran, tersa (26/04). Imajen Tatoli/Francisco Sony

“Soromutuk ne’e nu’udar pontu partida hosi prosesu planeamentu no elaborasaun Lei *das Grandes Opções do Plano*, ne’ebé tuir ona espíritu lei foun Enkuadramentu Orsamentál, ne’ebé Prezidente Repúblika promulga ona iha febreiru 2022,” Ministru Finansa, Rui Augusto Gomes, hateten hafoin ramata atividade iha auditóriu MF, Aitarak-laran.

Lei *Grandes opções do Plano* hanesan medida prinsipál ba (OJE) 2023, ne’ebé iha sesaun ne’e apresenta mós kona-ba previzaun makro-ekonomiku no makro-fiskál ba tinan 2022 no 2023.

Ministru dehan, ho promulgasaun Lei Estruturante, Timor-Leste marka pasu importante dahuluk iha área Reforma Fiskál no Jestaun Finansa Públika no hanesan konkista boot ida ba VIII Governu Konstitusionál.



Sesaun traballu planeamentu OJE 2023, iha auditóriu Ministériu Finansa, tersa (26/04). Imajen Tatoli/Francisco Sony

Ba oin, MF sei komtempla medida hirak ne'e iha Proposta Projetu Lei *das Grandes Opções do Plano* no sei apresenta iha Konsellu Ministru iha loron 04 maiu 2022 atu hetan apresiasaun no hafoin hetan ona aprovasaun, Governu sei apresenta ba Parlamentu Nasionál (PN) iha loron 10 maiu 2022 hodi diskute no aprova.

Nune'e, preparasaun iha nível téknika ba Proposta Projetu Lei *das Grandes Opções do Plano* la'o intensivamente durante fulan-ida ho balun, ne'ebé envolve rekollamentu medida setoriál no konsultasaun téknika ho entidade Estadu hamutuk 98 ne'ebé hola parte iha perímetru orsamentál.

MF mós halo ona analiza ba medida hosi entidade hirak ne'e, hodi asegura katak medida sira aliña ho Planu Estratéjiku Dezenvolvimentu, Programa VIII Governu Konstitusionál, Planu Estratéjiku Setorál, Planu Rekuperasaun Ekonómiku no dokumentu estratéjiku seluk ne'ebé aprova inklui mós halo aliñamentu ba Rezultadu Nasionál (*National outcomes*) ne'ebé daudaun ANAPMA dezenvolve hela.

“Ezersisiu ne'e foun no kompleksu tebes, maibé ho esforsu tomak hosi Diresaun Jerál Planeamentu no Orsamentu hosi Ministériu Finansa ho koordenasau ho ANAPMA, ohin ita bele hetan rezultadu ezbosu planeamentu tuir espíritu lei foun Enkudramentu Orsamentál. Parabéns ba ekipa tomak hosi Diresaun Jerál Planeamentu no Orsamentu no ANAPMA,” Ministru apresia.



Sesaun traballu planeamentu OJE 2023, iha auditóriu Ministériu Finansa, tersa (26/04). Imajen Tatoli/Francisco Sony

Sorumutuk ne'e prezide direta hosi Primeiru-Ministru, Taur Matan Ruak no modera hosi Ministru Finansa, Rui Gomes, ne'ebé hanesan Jornada Planeamentu dahuluk iha istória Timor-Leste, ne'ebé VIII Governu Konstitusionál realiza hafoin restaura independénsia iha tinan 20 liubá.

Aleinde ne'e, sesaun traballu ne'e organiza hosi Diresaun Jerál Planeamentu no Orsamentu hosi MF serbisu hamutuk ho Ajénsia Nasionál ba Planeamentu, Monitorizasaun no Avaliasaun (ANAPMA), ne'ebé semináriu loron ida-ne'e nia objetivu prinsipál mak atu diskute no identifika medida prinsipál ba OJE 2023 hodi rekupera ekonomia no promove kresimentu ekonómiku ne'ebé inkluzivu no sustentável.

Entidade ne'ebé partisipa iha biban ne'e mak hanesan Prezidente Autoridade, Administradór munisípiu, Responsável Instituisaun Estadu, Órgaun Servisu Fundu Autónoma, Diretór Jerál hosi liña ministeriál inklui téknika sira.

**Jornalista : Antónia Gusmão Editora : Julia Chatarina**